

四庫全書

子部

欽定四庫全書

太平御覽卷一百十

宋 李昉等 撰

皇王部三十五

唐高宗天皇帝  
則天皇后

中宗孝和皇帝  
睿宗玄貞皇帝

高宗天皇帝

唐書曰高宗天皇帝諱治太宗第九子也母曰文德順

聖皇后長孫氏以貞觀二年六月生於東宮之麗正殿  
五年封晉王七年進授并州都督幼而岐嶷端審寬仁  
孝友初授孝經於著作郎蕭德言太宗問曰此書中以  
何言為善對曰夫孝始於事親中於事君終於立身君  
子之事上也進思盡忠退思補過將順其美匡救其惡  
太宗悅曰行此足以事父兄為臣子矣及文德皇后崩  
晉王時年九歲哀慕感動左右太宗屢加慰撫由是特  
深寵異尋拜右武衛大將軍十七年皇太子承乾廢魏

王亦以罪黜太宗與長孫無忌房玄齡李世勣算計議  
立晉王為皇太子太宗每視朝常令在側觀決庶政或  
參議太宗數稱其善十八年太宗將伐高麗命太子留  
鎮定州及駕發有期悲號累日因請飛騎遞表起居并  
遞勅垂報並許之及軍旋太子從至并州太宗患癰太  
子親吮祖亮切之扶輦步從數日二十二年五月己巳太  
宗崩六月甲戌皇太子即皇帝位時年二十二詔大赦  
天下内外文武賜勲官一級永徽元年春正月辛丑上

不受朝詔改元丙午立妃王氏為皇后二年春正月戊戌詔曰去歲關輔之地頗弊蝗螟天下諸州或水旱百姓之間致有匱乏此由朕之不德兆庶何辜矜物罪已載深憂惕今獻歲肇春東方方始糧廩或空事資賑給其遭蟲水處有貧乏者量以正義倉賑貸五年春三月戊午幸萬年宮辛未赦岐州及所經州縣繫囚以工部尚書閔立德領丁夫四萬築長安羅郭八月大理奏決死囚摠有七十餘人六年九月庚午尚書右僕射褚遂

良以諫立武昭儀貶授潭州都督乙酉洛州大水毀天  
津橋冬十月己酉廢皇后為庶人立昭儀武氏為皇后  
大赦天下七年正月辛未廢皇太子忠為梁王立代王  
弘為太子壬申大赦改元為顯慶元年五月己卯太尉  
長孫無忌進史館所撰梁陳周齊隋五代史志三十卷  
五年八月庚辰蘇定方等討平百濟面縛其王扶餘義  
慈國分為五部郡三十七城二百戶七十六萬以其地  
置熊津等五都督府麟德元年三月辛亥展大禮十二

月丙戌殺西臺侍郎上官儀戊子庶人忠坐與儀交通  
賜死二年十月司禮太常伯劉祥道上疏請封禪癸亥  
高麗王高藏遣其子福男來朝丁卯將封泰山發自東  
都是歲大稔米斛五錢音年麥不列於市麟德三年春  
正月戊辰朔車駕至泰山頂是日親祀昊天上帝于封  
祀壇以高祖太宗配饗己巳帝升山行封禪之禮庚午  
禪社首祭皇帝地祇以大穆太皇太后文德皇太后配  
饗皇后為亞獻越國大妃燕氏為終獻辛未御降禪壇

壬申御朝覲壇受朝賀改麟德三年為乾封元年正月  
丙戌發自泰山甲午次曲阜縣幸孔子廟追謚太師增  
修祠宇以少牢致祭具褒聖侯德倫子孫並免賦役三  
月己未次亳州幸老君廟追號曰大上玄元皇帝創造  
祠堂改陽穀縣為真元縣縣人宗姓給復二年夏四月  
甲辰車駕至自泰山先謁太廟而後入壇庚寅改鑄乾  
封皇寶錢又十月己酉司空英國公勣為遼東送行臺  
大總管以伐高麗三年二月戊寅以明堂制度歷代不



同漢魏以還彌更訛舛遂增損古今新制其圖下詔大赦改元為總章元年二月戊寅幸九成宮九月癸巳司空英國公勣破高麗拔平壤城擒其王高藏及其大臣男建等以歸境內盡降其城一百七十上元二年三月丁巳天后親蠶於印山之陽時帝風疾不能聽朝政事皆決於天后自誅上官儀後上每視朝天后垂簾於御座後政事大小皆預聞之內外稱為二聖帝欲下詔令天后攝國政中書侍郎郝處俊諫止之調露元年十月

單于大都護府突厥阿史德溫傳及奉職二部相率反  
叛二年八月甲子廢皇太子弘為庶人幽於別所乙丑  
立英王哲為皇太子改調露二年為永隆元年大赦天  
下閏十月庚申上以服餌令皇太子監國丙寅雍州大  
風害禾稼價翔湧是月裴行儉大破突厥史伏念之衆  
伏念為程務挺急追來降行儉於是盡平突厥餘黨行  
儉執伏念振旅凱旋永淳二年春正月甲午朔幸奉天  
宮遣使祭蒿嶽少室箕山具茨等山西王母巢父許由

等祠十一月丁未自奉天宮還東都上疾甚宰臣以下  
並不得謁見冬十二月丁巳詔改永淳二年為弘道元  
年將宣赦書上欲親御則天門樓氣逆不能上馬遂召  
百姓於殿前宣之禮畢上問侍臣民庶喜否對曰百姓  
蒙赦無不感悅上曰蒼生雖喜我命危篤天地神祇若  
延吾一兩月之命得還長安死亦無恨是夕帝崩于貞  
觀殿時年五十六謚曰天皇大帝廟號高宗文明元年  
八月葬於乾陵天寶十三載改謚曰天皇大弘孝皇帝

則天皇后

唐書曰則天皇后武氏諱曌并州文水人也父士彥憂

切

隋大業末為鷹揚府隊正高祖行軍於汾晉每休止

其家義旗初起從平京城貞觀時遷工部尚書荊州都督

封應國公初則天年十四時太宗聞其美容止召入宮立

為才人及太宗崩遂為尼居感業寺大帝於寺見之復

召入宮拜昭儀時皇后王氏良姊蕭氏頻與武昭儀爭

寵更讒毀之帝皆不納進號宸妃永徽六年廢王皇后

而立武宸妃為皇后高宗稱天皇武后亦稱天后素多  
智計兼涉文史帝自顯慶已後多苦風疾百司表奏皆  
委天后詳決自此內輔國政數十年威勢與帝無異當  
時稱為二聖弘道元年十二月大帝崩皇太子顯即位  
尊天后為皇太后既將篡奪是日自臨朝稱制嗣聖元  
年春正月甲申朔改元二月戊午廢皇帝為廬陵王幽  
於別所仍改名哲己未立豫王輪為皇帝令居於別宮  
大赦天下改為文明皇太后仍臨朝稱制庚申廢皇太

孫重照為庶人九月柳州司馬徐敬業殺揚州長史陳敬之舉兵移檄天下左玉鈐衛大將軍李孝逸討平之垂拱四年五月皇太后加尊號曰聖母神皇是秋七月大赦天下八月壬寅博州刺史瑯琊王冲據博州起兵命左金吾大將軍丘神勣為行軍總管討之庚戌冲父豫州刺史越王貞舉兵與冲相應九月命內史岑長倩鳳閣侍郎張光輔左監門大將軍魏崇裕率兵討之丙寅斬貞及冲等傳首神都改其姓為虺氏曲赦博州韓

王元嘉魯王靈夔元嘉子黃國公謨靈夔子左散騎常侍范陽王藹霍王元軌及子江都王緒故號王鳳子東莞公融坐與貞通謀元嘉靈夔自殺元軌流配黔州謨等伏誅改姓虺氏自是宗室諸王相繼誅死者殆盡矣其子孫年幼者咸配流嶺外并誅其親黨數百餘家載初元年春正月神皇親饗明堂大赦天下依周制建子月為正月改十二月為臘來歲正月為一月大酺三日神皇自以盟字為名遂改詔書為制書秋九月革唐命改

國號為周改元為天授大赦天下乙酉加尊號為神聖  
皇帝降皇帝輪為皇嗣丙戌立武氏七廟追尊神皇父  
士護為孝明皇帝證聖元年春正月加尊號曰慈氏越  
古金輪聖神皇帝大赦天下大酺七日二月上去慈氏  
越古尊號秋九月親祀南郊加尊號天冊金輪聖神皇  
帝大赦天下改元為天冊萬歲大辟已下及犯十惡常  
赦所不原者咸赦除之大酺九日萬歲登封元年臘月  
上登封於神嶽大赦天下大酺九日丁亥禪于少室山



聖歷元年正月親享明堂大赦天下改元大酺九日三月召廬陵王哲於房州九月庚子廬陵王哲為皇太子令依舊名顯大赦天下神龍元年春正月大赦改元上不豫制自文明元年已後得罪人除揚豫博三州及諸逆魁首咸赦除之癸卯麟臺監張易之與弟司僕卿昌宗謀反皇太子率左右羽林軍桓彥範敬暉等以羽林入禁中誅之甲辰皇太子監國大赦天下是日上傳皇帝位于皇太子徙居上陽宮戊申皇帝上尊號曰則天

大聖皇帝冬十一月壬寅則天將大漸遺制祔廟歸陵  
令去帝號稱則天大聖皇后是日崩於洛陽宮之仙居  
殿年八十三謚曰則天大聖皇后祔葬於乾陵

中宗孝和皇帝

唐書曰中宗孝和皇帝諱顯高宗第七子母曰則天大  
聖皇后顯慶元年十一月生於長安明年封周王授洛  
州牧儀鳳三年徙封英王改名哲授英州牧永隆元年  
章懷太子廢其年立為皇太子弘道元年十二月高宗

崩皇太子即皇帝位皇太后臨朝稱制改元嗣聖元年  
二月皇太后廢帝為廬陵王幽於別所其年五月遷於  
均州尋徙居房陵聖厯元年召還東都立為皇太子依  
舊名顯時張易之與弟昌宗潛圖逆亂神龍元年鳳閣  
侍郎張柬之鸞臺侍郎崔玄暉左羽林將軍敬暉右羽  
林將軍桓彥範司刑少卿袁恕已等定策率羽林兵誅  
易之昌宗迎皇太子大赦天下鳳閣侍郎韋承慶正諫  
大夫房融司禮卿崔慶等下獄甲辰命地官侍郎樊忱

音  
謀往京師告陵廟乙巳則天傳位於皇太子丙午即皇

帝位於通天宮大赦天下惟易之黨與不在被赦之內

甲寅復國號依舊為唐社稷宗廟陵寢郊祀行軍旗幟

服色天地日月等字臺閣官名並依永淳已前故事甲

子立妃韋后為皇后大赦天下詔九品以上及朝集使

極言朝政得失兼舉賢良方正直言極諫之士景龍三

年十一月己丑親祀南郊皇后登堂亞獻左僕射舒國

公韋巨源為終獻大赦天下四年五月丁卯前許州司

兵參軍燕欽融上書言皇后干預國政安樂公主武延秀宗楚客等同危社稷帝怒召欽融廷見撲殺之時安樂公主志欲皇后臨朝稱制而求立為皇太子由是與后合謀進鴆六月壬申帝遇毒藥崩于神龍殿年五十五秘不發喪皇后親撫庶政立溫王重茂為太子甲申發喪于太極殿宣遺制皇后臨朝大赦天下改元唐隆丁亥皇太子即帝位時年十六皇太后韋氏臨朝稱制大赦天下常赦所不原者咸赦除之内外兵馬令諸親

王掌令韋溫搃之特召諸府折衝兵五萬人分屯京城  
列為左右營諸韋子姓分統之庚子夜臨淄王隆基舉  
兵誅諸韋諸武皆梟首於安福門外韋太后為亂兵所  
殺九月丁卯上諡曰孝和皇帝廟號中宗葬定陵天寶  
十三載二月改諡曰太和大聖大昭孝皇帝

睿宗玄貞皇帝

唐書曰睿宗玄貞皇帝諱旦高宗第八子中宗母弟龍  
朔三年六月己未生於長安其年封殷王領冀州大都督

單于大都護右金吾衛大將軍及長謙恭孝友好學工  
草隸尤愛文字訓誥之書乾封元年徙封豫王總章二  
年徙封冀王上初名旭輪至是去旭字上元二年復封  
豫王拜右衛大將軍儀鳳三年遷洛州牧徙封相王復封  
豫王嗣聖元年則天臨朝廢中宗為廬陵王立豫王為  
皇帝仍臨朝稱制及革命改國號為周降皇帝為皇嗣  
令依舊名輪徙居東宮其儀一比皇太子聖歷元年中  
宗自房陵還帝數稱疾不朝讓位於中宗則天遂立中

宗為皇太子封帝為相王又改名旦授太子右衛率長  
安中拜司徒右羽林衛大將軍自則天初臨朝及革命  
之際王室屢有變故帝每恭儉退讓竟免於禍神龍元  
年以誅張易之昆弟功進封安國相王遷太尉加實封其年  
立為皇太弟固辭不受景龍四年夏六月中宗崩韋庶  
人臨朝引用其黨分握政柄忌帝望素重潛謀陷害庚  
子夜臨淄王與太平公主薛崇簡前朝邑尉劉幽求  
折衝麻嗣宗及宮苑總監鍾紹京等率兵入北軍誅韋



溫紀處訥宗楚客武延秀馬秦客葉靜能趙復溫楊均  
等諸韋武黨與皆誅之辛丑帝挾少主御安福門樓慰  
謝百姓大赦天下其日王公百寮上表咸以國家多難  
宜立長君以帝報望所歸請即尊位甲辰少帝詔曰叔父相  
王高宗之子昔以天下讓於先帝孝友寬簡彰信兆人  
神龍之初已有明旨將立太弟以為嗣君為王懇辭未  
行冊命所以東宮虛位至于歷年徹綴涉街反在辰禍變  
倉卒然後稱制計立冲人欽奉前懷願遵理命上申先

聖之旨下遂蒼生之心俯稽圖緯之文仰欽祖宗之烈  
即今日請叔父相王即皇帝位朕退守本藩歸於舊邸  
凡百卿士敬承朕言克贊我天人之休期光我有唐之  
勲業布告遐邇咸使聞知相王上表讓曰臣以宗社事  
重國家情深誅鋤巨逆奉戴嗣王今承制旨猥推宸極  
在臣虛薄不敢祇膺循還震驚無任感哽制答曰皇極  
大寶天下至公王者臨之益非獲已叔父勲在社稷蒼  
生推仰龍光紫宸實允係望請遵前旨勿或推讓於是

少帝遜於別宮是日即皇帝位御承天門樓大赦天下

景雲三年春正月辛未朔謁太廟癸酉上始釋慘切七威

服御正殿受朝賀甲戌并汾絳三州地震壞人廬舍辛

巳親祀於南郊戊子躬耕籍田己丑大赦天下改元為

太極春二月丁卯皇太子釋奠於國學追贈顏回為太

子太師曾參為太子太保每年春秋釋奠以四科弟子

及曾參從祀列七十二賢上八月庚子帝傳位於皇太

子自稱曰太上皇帝五日一受朝於太極殿自稱曰朕

三品以上除授及大刑獄並決之其處分事稱誥令皇帝每日受朝于武德殿自稱曰予三品以下除授及徒罪並令決之其處分事稱制勅甲辰大赦天下改元為先天二年秋七月甲子太平公主與左僕射竇懷貞侍郎岑義等謀逆事覺皇帝率兵誅之窮其黨羽太子少保薛稷左散常侍賈膺福右羽林將軍李慈李欽中書舍人李猷中書令崔湜尚書左丞盧藏用太史令傅孝忠僧惠範等皆誅之兵部尚書郭元振從上御承天門樓

大赦天下自大辟罪已下無輕重咸赦除之翼日太上  
皇誥曰朕將高居無為自今已後軍國刑政一事已上  
並令皇帝處分開元四年夏六月甲子太上皇帝崩于  
百福殿時年五十五諡曰大聖貞皇帝廟號睿宗冬十  
月葬于橋陵天寶十三載改諡曰玄貞大聖大興孝皇  
帝

太平御覽卷一百十

欽定四庫全書

太平御覽卷一百十一

宋 李昉等 撰

皇王部三十六

唐玄宗明皇帝

安祿山 附

玄宗明皇帝

唐書曰玄宗明皇帝諱隆基睿宗第三子也母曰昭成  
順聖皇后竇氏垂拱元年秋八月戊寅生於東都性英

斷多藝尤知音律善八分書儀範偉麗有非常之表三年閏七月丁卯封楚王天授二年十月戊戌出閤開府置官屬年始七歲朔望車騎至朝堂金吾將軍武懿宗忌上嚴整訶排儀仗因欲折之上叱之曰吾家朝堂干汝何事敢迫吾騎從則天聞而特加寵異尋即入閤長壽二年臘月丁卯改封臨淄郡王聖歷元年出閤賜第於東都積善坊大定元年從幸西京賜宅於興慶坊長安中歷右衛郎將尚輦奉御神龍元年遷衛少卿景龍

二年四月兼潞州別駕十二月州境有黃龍白日昇天  
嘗出政有紫雲在其上後從者望而得之前後符瑞凡  
一十九事四年中宗將祀南郊來朝京師將行使術士  
韓禮筮之一著孑然獨立禮驚曰著立竒瑞非常也不  
可言屬中宗末年王室多故上嘗陰引材力之士以自  
助上所居宅外有水池漫溢頃餘望氣者以為龍氣四  
月中宗幸其第因遊其池結綵為樓舫令巨象蹈之六  
月中宗暴崩韋后臨朝稱制韋溫宗楚客紀處訥等謀



傾宗社以睿宗介弟之重先謀不利道士馮道力處士  
劉承祖皆善占兆詣上布誠款上所居里名隆慶時人  
語訛以隆為龍韋庶人稱制改元又為唐隆皆符瑞御  
名上益自負乃與太平公主謀之公主喜以子崇簡從  
上乃與崇簡朝邑尉劉幽求長上折衝麻嗣宗押萬騎果  
毅葛福順李仙鳧寶昌寺僧普潤等定策誅之或請先  
啟相王上曰我極社稷之危救君父之急事成福歸於  
宗社不成身死於忠孝安可先請怖憂大王乎若請而

從是王與危事請而不從則吾計失矣遂以庚子夜率  
幽求等數十人自苑南入掖監鍾紹京又率丁匠百餘  
人以從分遣萬騎往玄武門殺羽林將軍韋璿韋播高  
嵩持首而至報讜叫大集攻白獸立德等門斬關而進  
左萬騎自左入右萬騎自右入合於凌烟閣前時太極  
殿前宿衛梓宮萬騎聞譟聲皆披甲應之韋庶人惶恐  
走入飛騎營為亂兵所害於是分遣誅韋氏之黨比明  
內外討捕皆斬之乃馳謁睿宗謝不先啟請之罪睿宗

遽前拽上而泣曰宗社禍難由汝安定神祇萬姓賴汝之力也拜殿中監同中書門下三品兼押左右萬騎進封平王睿宗即位與侍臣議立皇太子僉曰除天下之禍者享天下之福拯天下之危者受天下之安平王有聖德定天下又聞成器已下咸有推讓宜膺主鬯以副羣心睿宗從之丙午制立為皇太子延和元年凶黨因術人間睿宗曰據玄象帝座前星有災皇太子合作天子不合更居東宮矣睿宗曰傳德避災吾意決矣七月

壬午下制曰皇太子某有大德於天地定阼危於社稷  
溫文既習聖敬克躋委之監撫已移年歲時政益明庶  
工惟叙朕之知子庶不負時厯數在躬宜陟元后可令  
即皇帝位有司擇日授冊朕方比迹洪古希風太皇神  
與化遊思與道合無為無事豈不美歟王公百寮宜識  
朕意上惶懼遽馳見叩頭請所以傳位之意睿宗曰吾  
因汝功業得宗社今帝座有青思欲遜避唯聖德大勲  
始轉禍為福易位於汝吾知免矣上始居武德殿視事

三品已下除授及徒罪皆決之先天二年七月三日尚書左僕射竇懷貞侍中岑羲中書令蕭志忠崔湜雍州長史李晉左羽林大將軍常元楷知羽林將軍李慈等與太平公主同謀期以其月四日以羽林兵作亂上密知之因以中旨告岐王範薛王業兵部尚書郭元振將軍王毛仲少監姜皎中書侍郎王琚吏部侍郎崔日用等定計因毛仲取閑廐馬及家人三百餘人率太僕少卿李令問王守一內侍高力士果毅李守德等親信十

穀人出武德殿入度化門臬常元楷李德於北闕擒賈  
興福李猷於內客省以出執蕭志忠岑義於朝堂皆斬  
之睿宗明日下詔曰朕將高居無為自今軍國刑政一  
事已上並令皇帝處分上御承天樓下制大赦天下冬  
十一月甲申幸新豐之溫湯癸卯講武於驪山兵部尚  
書代國公郭元振坐虧失軍容配流新州給事中攝太  
常少卿唐紹以軍禮有失斬於纛下甲辰畋獵於渭川  
同州刺史梁國公姚元之為兵部尚書同中書門下三

品冬十一月戊子上加尊號為開元神武皇帝十二月  
庚寅朔大赦天下改為開元四年六月癸亥太上皇崩  
九年四月甲戌上親策試應制舉人於含元殿謂曰古  
有三道合減二策近無甲科朕將存其上第務收賢俊  
十三年冬十月辛酉東封太山發自東都十一月丙戌  
至兗州岱宗丁亥致齋於行宮己丑日南至備法駕  
登山仗衛羅列岳下百餘里詔行徒留於谷口上與宰  
臣禮官昇山庚寅祀昊天上帝於上壇有司祀五帝百

神於下壇禮畢藏玉冊於封祀壇之石礧然後燔柴燎  
發羣臣稱萬姓傳呼自山頂至岳下震動山谷還齋宮  
慶雲見日抱戴辛卯祀皇帝地祇于社首歲玉冊於石  
礧如封祀壇之禮壬辰御帳殿受朝賀大赦天下封太  
山神為天齊王禮秩加三公一等環山十里禁其樵採  
賜酺七日甲午發岱岳丙申幸孔子宅親設奠祭於冬  
十二月己巳至東都時累歲豐稔東都米斗十錢青齊  
米斗五錢是冬分吏部為銓勅禮部尚書蘇頌刑部尚



書章杭工部尚書盧徙愿等分掌選事十四年五月癸卯戶部進計帳今年管戶七百六萬九千五百六十管口四千一百四十一萬九千七百一十二二十二年五月關中大風拔木同州尤甚是夏上自於苑中種麥率皇太子以下躬自收穫謂太子等曰此將薦宗廟是以躬親亦欲令汝等知稼穡之難也因分賜侍臣謂曰比歲令人巡檢苗稼所對多不實故自種植以觀其成且春秋麥禾豈非古人所重也二十五年春正月壬午制

曰朕猥集休運多謝哲王然而哀矜之情小大必慎自  
臨寰宇子育蒸黎未嘗行極刑起大獄上玄降鑒應以  
祥和思協平邦之典致之仁壽之域自今有犯死刑除  
十罪宜令中書門下與法官詳所犯輕重具狀奏聞秋  
七月己卯大理少卿徐祐奏天下今歲斷死刑五十八  
人幾致刑措二十七年八月甲申追贈孔宣父為文宣  
王顏回為兗國公餘十哲皆為侯夾坐嗣褒聖侯改封  
為文宣公二十九年正月制兩京諸州各置玄元皇帝

廟并置崇玄學天寶元年正月丁未朔大赦天下改元  
常赦不原咸赦除之百姓有欠負租稅及諸色並免之  
前資官及白身人有儒學博通文詞秀逸及軍謀武藝  
者所在具以名薦京文武官堪官為刺史者各令封狀  
自舉改黃鉞為金鉞內外官各賜勲兩轉甲寅陳王府  
叅軍田同秀上言玄元皇帝降見於丹鳳門之通衢告  
靈符在尹喜之故宅上遣使者即于故闕尹喜臺下發  
得之乃置玄元廟於大寧坊二月丁亥上加尊號為開

元天寶聖武神文皇帝辛卯親享玄元皇帝于新廟甲子  
親享太廟丙申合祭天地于南郊置天下囚徒罪無輕  
重並釋放三載正月丙辰朔改年為載四載秋八月甲辰  
冊太真楊氏為貴妃七載三月乙丑天同殿柱產玉芝  
有神光照殿羣臣請加皇帝尊號曰開元天寶聖文神  
武應道皇帝許之夏五月壬午上御興慶宮受冊徽號  
大赦天下六月范陽節度使安祿山請實封鐵券十一  
載十一月庚申御史大夫兼蜀郡長史楊國忠為右相

無吏部尚書十三載二月祿山奏前後討奚契丹功將士跳盪等請超三資於是超授將軍者五百餘人中郎將者二千餘人十四載冬十月壬辰幸三清宮丙寅范陽節度使安祿山蕃漢之兵十餘萬自幽州南向詣闕以誅楊國忠為名先殺太原尹楊光翽於博陵郡壬申聞於行在所癸酉以郭子儀為靈武太守朔方節度使封常清自安西入奏至行在甲戌以常清為范陽平盧節度使令募兵三萬以禦逆胡戊寅還京十二月丙戌

朔祿山於靈昌郡渡河辛卯臨陳留郡殺張介然甲午  
臨滎陽郡殺太守崔無詖丙申封常清與賊戰于成臯  
鬬于谷官軍敗績常清奔于陝郡丁酉安祿山陷東京  
殺留守李愔御史中丞盧奕判官蔣清時高仙芝鎮陝  
郡棄城西保潼關常山太守顏杲卿與長史袁履謙賈  
深等執賊將何千年高邈送京師辛丑詔以皇太子統  
兵東討十五年春正月乙卯御宣政殿受朝其日祿山  
僭號於東京六月庚寅哥舒翰將兵八萬與賊將崔乾

祐戰於靈寶西原官軍大敗死者十六七甲午將謀幸  
蜀乃下詔親征詔下後士庶恐駭奔走于路乙未凌晨  
自延秋門出微雨沾濕扈從唯宰相楊國忠韋見素內  
侍高力士太子親王妃主皇孫已下多從之不及平明  
渡便橋國忠欲斷橋上曰後來者何以能濟命緩之辰  
時至咸陽望賢驛置頓官吏駭散無復儀衛上憩於宮  
門之榭下亭午未進食俄有父老獻麥飯上謂之曰爾  
可進飯於是百姓獻食相繼俄而尚食持御膳至上頌

給從官而後食是日次金城縣官吏已遁令魏方進男  
允招誘俄得智藏寺僧進葛粟行從方給丙辰次馬嵬  
驛諸衛頓軍不進龍武大將軍陳玄禮奏曰逆胡指關  
以誅國忠為名然中外羣情不無嫌恐今國步艱阻乘  
輿震蕩陛下宜徇羣情為社稷大計楊國忠之徒可致  
之於法會吐蕃使二十一人遮國忠告訴於驛門眾即  
呼曰楊國忠連蕃人謀逆兵士圍驛四合誅楊國忠及  
魏方進一族兵猶未解上令高力士詰之回奏曰諸將



既誅國忠以貴妃在宮人情恐懼上即命力士賜貴妃  
自盡玄禮等見上請罪命釋之丁酉將發馬嵬驛朝臣  
惟韋見素一人乃命見素子京兆府司錄諤為御史中  
丞充置頓使議其所向軍士或言阿隴或言靈武太原  
或請還京韋諤曰還京須有捍賊之備今兵馬未集恐  
非萬全不如且幸扶風徐圖所向上詢於眾眾以為然  
及行百姓連路乞留皇太子願并力破賊收復京城即  
日留太子戊戌次扶風縣己亥次扶風郡軍士各懷去

就咸出醜言陳玄禮不能制會益州貢春綵十萬匹上  
悉命置於庭召諸將諭之曰卿等國家功臣陳力久矣  
朕之優獎常亦不輕逆胡背恩事須迴避甚知卿等不  
得別父母妻子朕亦不及親辭九廟言發流涕又曰朕  
須幸蜀路險狹若人多惟恐難供承今有此綵卿等即  
宜分取各圖去就朕自有子弟中官相隨便與卿等訣  
別衆咸俯伏涕泣曰死生願從陛下帝曰去住任卿自  
是悖亂之言稍息庚子以司勳郎中劍南節度留後崔

圓為蜀郡長史劍南節度副大使以穎王璲為劍南節度大使以監察御史宋若思為御史中丞充置頓使韋諤充巡閣道使並令先發辛丑發扶風郡是夕次陳倉壬寅次散關分部下為六軍穎王璲先行壽王瑁等分統六軍前後左右相次丙午次河池郡崔圓奏劍南歲稔民安儲供無闕上悅授圓中書侍郎同中書門下平章事蜀郡長史劍南節度如故以前華州刺史魏仲犀為梁州刺史秋七月壬戌次益昌縣渡吉柏江有雙魚

夾舟而躍議者以為龍甲子次普安郡憲部侍郎房瑄  
自後至上與語甚悅即日拜為吏部尚書同中書門下  
平章事丁卯詔以皇太子充天下兵馬元帥都統朔方  
河北河東平盧等節度兵馬收復兩京庚午次巴西郡  
庚辰車駕至蜀郡扈從官吏軍士到者一千三百人宮  
女二十四人而已八月癸未朔御蜀郡府宣詔大赦天  
下癸卯靈武使至始知皇太子即位丁酉上用靈武冊  
稱上皇詔稱誥己亥上皇臨軒降冊肅宗命宰臣韋見

素房瑄使靈武冊命朕稱太上皇軍國大事先取皇帝處分後奏朕知俟克復兩京朕當怡神姑射偃息大庭明年九月郭子儀收復西京十月肅宗中使啖進庭瑤入蜀奉迎丁卯上皇發蜀郡十一月丙申次鳳翔郡肅宗遣精騎三千至扶風迎衛十二月丙戌肅宗具駕至咸陽望吳驛迎奉上皇御宮之樓肅宗拜慶樓下嗚咽流涕不自勝為上皇徒步控轡上皇撫背止之使騎馬前導丁未至京師文武百寮京城庶士夾道歡呼靡不

流涕即日御大明宮之含元殿見百寮上皇自責人人  
感咽上皇詣廟請罪遂幸興慶宮三載二月肅宗與羣  
臣奉上皇尊號曰太上至道聖皇帝乾元二年七月丁  
未移幸西內之甘露殿時奄官李輔國離間肅宗故移  
居西內高力士陳玄禮等遷謫上皇寢不悅上元二年  
四月甲寅崩于神龍殿時年七十八謚曰至道大聖大  
明孝皇帝廟號玄宗初上皇親拜五陵至橋陵見金粟  
山有龍盤鳳翥之勢復近先塋謂侍臣曰吾千秋後宜

葬此地得奉先陵不忘敬矣至是追先旨以創寢園廣  
德元年三月辛酉葬太陵

安祿山附

唐書曰安祿山營州柳城西北夷人也本無姓氏名軋  
犖山母阿史德氏亦突厥巫師以卜為業開元初與將  
軍安道買男俱逃出突厥中道買次男貞節為嵐州別  
駕收獲之年十餘歲矣冒姓為安及長解六蕃語二十  
年張守珪為幽州節度祿山盜羊事覺守珪剝縛欲棒

殺之大呼曰大夫不欲滅兩蕃耶何為打殺祿山守珪  
見其肥白壯其言而釋之令與鄉人史思明同捉生行  
必克獲授為偏將以驍勇聞遂養為子二十八年為平  
盧兵馬使性巧黠人多譽之授營州都督平盧軍使厚  
賂往來者乞為好言玄宗益信向之天寶元年以平盧  
為節度以祿山攝中丞為使入朝奏事玄宗益寵三載  
代裴寬為范陽節度河北採訪平盧軍等使如故採訪使  
張利貞嘗受其賂及李林甫並言其美玄宗意益堅後



請為貴妃養兒入對皆先拜太真玄宗恠問之對曰臣  
是蕃人先母而後父玄宗大悅遂命楊鈺已下並約為  
兄弟姨妹晚年益肥壯垂手過膝重三百三十斤每行  
時以肩膊左右擡挽其身方能移步至玄宗前作胡旋  
舞疾如風馬為置第宇窮極壯麗上御勤政樓於御座  
東為設一大金雞障前置一榻坐之十載入朝又求為  
河東節度因拜之長子慶宗太僕卿少子慶緒鴻臚卿  
慶宗又尚郡主祿山陰有逆謀於范陽北築棚武城外

示禦寇內貯兵器積穀為保守計戰馬萬五千匹牛羊  
稱是秉三節度進奏無不允每月進奉生口馳馬鷹犬  
既肥大不任戰十一年八月祿山併率河東等軍十五  
萬以討契丹去盧千餘里至上護真河即北黃河也倍  
程奄至契丹牙帳屬久雨弓箭皆漲濕將士困極奚又  
夾攻之殺傷畧盡祿山被射以麾下奚小兒二千餘人  
走止出墜坑中其男慶緒等扶之會夜解走投平盧城  
楊國忠屢奏祿山必反玄宗使中官輔璆琳覘之得其

賄賂盛言其忠十三載正月謁於華清宮因涕泣言臣  
蕃人不識字陛下擢臣不次被楊國忠欲得殺臣玄宗  
益親厚之遂以為左僕射却迴又請為開厩隴右羣牧  
等都使又請知總監事既為開厩羣牧等使上筋脚馬  
皆陰選擇之三月歸范陽疾行出關日三四百里至范  
陽人言反者玄宗必大怒縛送與之十四載十一月反  
於范陽矯稱奉恩命以討逆賊楊國忠以諸蕃馬步十  
五萬以高尚嚴莊為謀主孫孝哲高逸何千年為腹心

天下承平日久人不知戰聞其兵起朝廷震驚禁衛皆  
市井商販之人乃以高仙芝封常清等擊之祿山又嚴  
肅得死力無不一當百遇之必敗十二月渡河遂入陳  
留郡太守郭納出降至滎陽太守崔無詖拒戰城陷死  
之次于汜水鬲子谷乃取谷南而過東京太守李愷中  
丞盧奕使採訪判官蔣清燒絕河陽橋祿山入東京殺  
李愷盧奕蔣清召河南尹達奚詢使之蒞事十五年正  
月賊竊號燕國王年號聖武達奚詢已下署為將相五

月南陽節度魯炁率荆襄黔中嶺南子弟十萬與賊將  
武令珣戰于葉縣城北潢河王師盡沒六月李光弼郭  
子儀出土門路敗賊衆於常山郡東嘉山河北諸郡順  
歸者千餘祿山窘急圖欲却投范陽會哥舒翰自潼關  
領馬步八萬與賊將崔乾祐戰於靈寶西為賊覆敗西  
奔潼關為其帳下執送與賊關門不守玄宗幸蜀十一  
月遣阿史那承慶攻陷潁州屠之祿山以體肥及造逆  
後兩眼漸暗至是不見物又苦疽疾至德二年正月朔

受朝瘡甚而中罷尤躁急動用斧鉞嚴莊亦被捶撻莊謀立慶緒領李猪兒同入祿山帳中猪兒以大刀斫其腹祿山眼無所見捫床頭刀不得但撼幄帳中大呼曰是我家賊腹已破血流數斗在床上言訖氣絕莊即宣言於外言祿山傳位於晉王慶緒縱樂飲酒無度呼莊為兄事之小大必咨之慶緒為偽主素懦弱言詞無序二月肅宗南幸鳳陽郡始知祿山死使僕固懷恩使于回紇結婚請兵討逆九月廣平王領蕃漢之衆收西

京走安守忠賊之死者積如山阜王師乘勝至陝郡賊懼令嚴莊傾其驍勇而來拒廣平王遣副元帥郭子儀等與賊戰于陝州西曲沃大破之斬首十餘萬嚴莊奔至京告慶緒慶緒率其餘衆奔河北保節郡嚴莊至河內南來歸順賊將阿史那承慶等麾下三萬餘衆悉奔恒趙范陽從慶緒者唯疲卒一千騎三百而已乾元年九月肅宗遣郭子儀等九節度率步騎二十萬以攻之子儀使善射者三千人伏於壘垣內明日接戰子儀

麾其屬偽奔慶緒逐之伏者齊發賊軍大潰使薛嵩求  
救於史思明言禪讓之禮思明先遣李歸仁以步騎二  
萬馬軍三千先往滏陽以應之及至滏陽子儀之圍已  
固築城穿塙各三重引水以灌城下思明南攻魏州節  
度使崔光遠南走思明據之乾元二年正月思明稱周  
王慶緒自十月被圍至二月城中人相食思明引衆來  
救三月子儀等戰敗遂解圍而南斷河陽橋以守穀水  
思明領其衆營於節縣南慶緒使收子儀等營中糧千



六石萬石張通儒高尚平列謂慶緒曰史王遠來臣等皆合迎謝對曰任公暫往見思明思明與之涕泗厚其禮復令歸城經三日慶緒以三百騎詣思明引入令三軍環甲執兵待之及至庭再拜稽首曰臣不克負荷棄失兩都久陷重圍不意大王以太上皇之故將兵遠救思明曰棄失兩都用兵不利亦何事也爾為人子殺汝父以求位庸非大逆乎吾為太上皇討賊即牽出并其四弟及高尚孫孝哲崔乾祐皆縊殺之祿山父子僭逆

三年而滅

太平御覽卷一百十一

欽定四庫全書

太平御覽卷一百十二

宋 李昉等 撰

皇王部三十七

唐肅宗宣皇帝

史思明 附

代宗孝武皇帝

肅宗宣皇帝

唐書曰肅宗宣皇帝諱亨玄宗第三子也母曰元獻皇

后楊氏景雲二年乙亥生初名嗣昇二歲封陝王五歲  
拜安西大都護河西四鎮諸蕃落大使上仁愛穎悟得  
之天然及長聰敏強記屬辭典麗耳目之所聽覽不復  
遺忘開元十五年正月封忠王改名浚五月領朔方大  
使單于大都護十八年奚契丹犯塞以上為河北道元  
帥信安王諱為副元帥御史大夫李朝隱京兆尹裴奩  
先等八總管兵以討之仍命百寮設次于光順門與上  
相見左丞相張說退謂學士孫逖韋述曰嘗見太宗寫真

圖忠王英姿穎發儀表非常雅類聖祖此社稷之福也  
二十年諸將大破奚契丹以上遙統之功加司徒二十  
三年正月更名璵後皇太子英得罪立上為皇太子天  
寶十二載十一月安祿山來朝上嘗密奏云祿山有反  
相玄宗不聽十四載十一月祿山果叛十二月丁未陷  
東京辛丑制太子監國仍遣上親率諸軍進討時祿山  
以誅楊國忠為名由是軍民切齒於楊氏國忠懼乃與貴  
妃謀間其事上遂不行乃詔河西節度哥舒翰為皇太

子前鋒兵馬元帥今率衆二十萬守潼關明年六月哥舒翰為賊所敗關門不守玄宗幸蜀丁酉至馬嵬兵軍不進請誅楊氏於是誅國忠賜貴妃自盡軍馬將發留上在後宣諭百姓衆泣而言曰逆胡背恩主上播越臣等生於聖代世為唐民願戮力一心為國討賊請徙太子收復長安玄宗聞之曰此天啟也乃令高力士與壽王瑁送太子內人及服御等物留後厩馬軍徙上令力士口宣曰汝好去百姓屬望慎勿違之莫以吾為

意且西戎北狄吾嘗厚之當今國步艱難必得其用汝其勉之上回至渭北便橋已斷水暴漲無舟楫上號令水濱百姓歸者三千餘人渭水可涉又過潼關散卒誤以為賊與之戰士衆多傷死既而覺之乃收其餘以北上軍既濟後者皆溺上喜以為天之眷佑時從上唯廣平建寧二王及四軍將士才二千人自衛而北夕次永壽百姓遮道獻牛酒有白雲起西北長數丈如樓閣之狀議者以為天子氣戊戌至新平郡時晝夜奔馳三百



餘里士眾器械亡失過半所存之眾不過一旅時賊據  
長安知上治兵河西三輔百姓皆曰吾太子大軍即至  
賊望西北塵起有時奔走七月辛酉上至靈武時魏少  
游預備供帳無不畢備裴寬杜鴻漸等從容進曰今寇  
逆亂常毒流函洛主上倦勤大位移幸蜀川江山阻修  
奏請路絕宗社神器須有所歸萬姓顓顓思崇明聖天  
意人事不可固違伏願殿下順彼輿情以安社稷王者  
之大孝也上曰俟平寇逆奉迎鑾輿從容儲闈侍膳左

右豈不樂哉公等何忽忽也冤等凡六上牋辭情激切上不獲已而從之是月甲子上即皇帝位於靈武即日奏上皇是日御靈武南門下制大赦天下改元曰至德以朔方度支副使大理司直杜鴻漸為兵部郎中朔方節度判官崔漪為吏部郎中並知中書舍人事以御史中丞裴冕為中書侍郎同中書門下平章事改靈武郡為大都督府癸巳上所奉表始達成都丁酉上皇遜位稱誥遣左相韋見素吏部尚書房琯門下侍郎崔渙等

奉冊書赴靈武九月戊辰上南幸彭原郡丙子至順化  
郡韋見素房瑄崔渙等自蜀郡賁上冊書及傳國寶等  
至上素知房瑄名至是瑄請為兵馬元帥收復兩京許  
之二載正月庚戌朔上在彭原受朝賀是日通表入蜀  
賀上皇上皇遣平章事崔圓奉誥赴彭原乙卯朔逆胡  
安祿山為子慶緒所殺九月持四節與回紇葉護太子率  
兵四千助國討賊葉護入見宴賜加等丁亥元帥廣平  
王統率朔方安西回紇南蠻大食之衆二十萬東向討

賊壬寅與賊將安守忠李歸仁等戰于香積寺西北賊軍大敗斬首六萬級賊帥張通儒棄京城東走癸卯廣平王收西京甲辰捷書至行在即日告捷於蜀上皇遣裴寬入京啟告郊廟社稷冬十月癸丑賊將尹子奇陷睢陽害張巡姚閭執許遠賊自香積之敗悉衆保陝郡廣平王統郭子儀等進攻與賊軍戰于陝西之新店賊衆大敗斬首十萬級橫屍三十里庚申安慶緒與其黨奔河北壬戌廣平王入東京陳兵天津橋南士庶歡呼

路側陷賊官偽署侍郎陳希烈等三百餘人素服待罪  
癸亥上自鳳翔還京仍遣太子太師韋見素入蜀迎上  
皇鳳陽郡給復五載丙寅至望賢宮得東京捷書至上  
大喜丁卯入長安士庶涕泣拜抃曰不圖復見吾君上  
亦為之感惻九廟為賊所焚上素服哭于廟三日入居  
大明宮十二月丙午上皇至自蜀上自望賢宮奉迎上  
皇御宮南樓上望樓辟易下馬趨進樓前再拜舞蹈稱  
慶上皇下樓上匍匐捧上皇足涕泗嗚咽不能自勝遂

扶侍上皇御殿親自進食自試御馬以進又攏轡而行止  
之後退上皇曰吾享國長久吾不知貴見吾子為天子吾  
知貴矣上乘馬前道自開遠門至丹鳳門旗幟燭天綵棚  
夾道士庶舞扞路側皆曰不圖今日再見二聖百寮班於  
含元殿庭上皇御殿左相苗晉卿率百辟稱賀人人無不  
感咽禮畢上皇詣長樂殿謁九廟神主即日幸興慶宮上  
請歸東宮上皇遣高力士再三慰喻而止三載正月甲戌  
朔戊寅上皇御宣政殿冊皇帝尊號曰光天文武大聖孝

感皇帝乙巳上御興慶殿奉冊上皇徽號曰太上至道聖  
皇天帝丁未御丹鳳門大赦天下改至德三載為乾元元  
年二年九月庚寅逆胡史思明陷洛陽副元帥李光弼守  
河陽汝鄭滑等州陷賊三年閏四月朔禁出西方其長數  
大已卯以星文變異上御明鳳門大赦天下改乾元為上  
元追封周太公望為武成王依文宣王例置廟時大霧自  
四月雨至閏月末不止米價翔貴人相食飢死者委骸于  
路二年三月甲子史朝義率衆賊襲我陝州衛伯玉逆擊

敗之戊戌史思明為其子朝義所殺九月壬午制自今已  
後聖號惟稱皇帝其年號但稱元年去上元之號其以今  
年十一月為歲首便數建丑建寅每月以所建為數建卯  
月辛亥朔上御明鳳門大赦以京兆府為上都河南府為  
東都鳳翔為西都江陵為南都太原為北都建巳月庚戌  
朔壬子楚州刺史崔旆表獻定國寶玉十三枚甲寅太上  
皇崩于西內神龍殿上自仲春不預聞皇上登遐不勝哀  
悸因茲大漸乙丑詔皇太子監國下又曰上天降寶獻自



楚州因以體元叶乎五紀其元年宜改為寶應建巳月  
為四月餘月並依常數乃依舊以正月一日為歲首丁卯  
宣遺詔是日上崩于長生殿年五十二謚曰文明武德大  
聖大孝宣皇帝廟號肅宗寶應二年三月葬于建陵

史思明附

唐書曰史思明本名宰于營州寧夷州突厥西北夷人  
也姿瘦少鬚鵞肩偃背顰目側鼻性急躁與安祿山同  
鄉里先祿山一日生思明除日生祿山歲日生及長

相善俱以驍勇聞初事特進烏知義每令輕騎覘賊必  
生擒以歸又解六蕃語與祿山同為互市郎張守珪為  
幽州節度奏為折衝天寶初頓立戰功官至將軍知平  
盧軍事嘗入奏玄宗賜坐與語甚奇之問其年曰四十  
矣玄宗撫其背曰卿貴在後勉之遷大將軍北平太守  
十一載安祿山奏授平盧節度都知兵馬使十四載祿  
山反命思明攻饒陽等郡陷之十五載正月六日思明  
與蔡希德圍顏杲卿於常山九日拔之又圍饒陽二十

九日不能拔李光弼出土門救常山思明解圍而拒光  
弼光弼列兵於城南相持累月光弼草盡使精卒以車  
數乘於旁縣取草輒被擊之其後率十疋共得兩束草  
至劉蕡薦以飼之初祿山以賈循為范陽留後謀歸順  
為副留守向潤客所殺以思明代之又以征戰在外令  
向潤客代其任四月朔方節度郭子儀以朔方蕃漢二  
萬人自土門而至常山軍威遂振南收趙郡思明退保  
博陵五月十日子儀光弼敗思明于沙河上思明以騎

卒奔嘉山光弼擊之又敗走入博陵郡光弼圍之城方拔屬潼關失守肅宗理兵于朔方使中官邢延恩追朔方河東兵馬光弼入土門思明隨後邀擊之思明將卒之精銳者皆破平盧所得戰士南收常山趙郡又攻河間平原顏真卿以兵食既盡乃渡河而南由是河北之地悉陷於思明至德二年正月思明以蔡希德合范陽上黨兵馬十萬圍光弼于太原光弼使為地道出至城陣前驍賊方戲弄城中人地道中人擒而曳之賊以為

神呼為地藏菩薩。思明留十月。會安祿山死。慶緒令歸范陽。希德留百餘日。竟不能拔而歸。自祿山陷兩京。常以駱駝運兩京御府珍寶於范陽。不知紀極。由是資其逆謀。思明轉矯慶緒之命。慶緒為王師所敗。拔鄴郡。其下蕃漢兵五萬人。初不知所從。思明擊殺三千人。然後降之。慶緒使阿史那承慶安守忠徵兵於思明。且欲圖之。判官耿仁智忠謀之士也。謂思明曰：「大夫威重人不敢言。仁智請一言而死。」思明曰：「試言之。」對曰：「大夫久事

祿山祿山兵權如是誰敢不服如大夫比者逼於亮威耳固亦無罪今聞孝感皇帝聰明勇智有少康周宣之畧大夫發使輸誠必開懷見納此轉禍為福之上策也思明曰善慶承等以三千騎至范陽思明悉衆介冑以逆之衆且數萬去之一里使人謂之曰相公及王還至將士等不勝喜躍此皆邊兵怯懦頗懼相公之衆莫敢進也請弛弓以安之從之思明遂以承慶守忠入內廳飲酒別令諸將於其所分收其甲仗其諸郡兵皆資糧歸

之欲留者分隸諸營遂拘承慶斬守忠及李立節之首  
會李光弼使衙官敬挽招之思明遂令衙官賁子昂奉  
表以所管兵衆八萬人燕以偽河東節度高秀巖等來  
降肅宗大悅封思明為歸義王范陽長史御史大夫河  
北節度使朝義以下並為列卿秀巖雲中太守以其男  
如岳等七人為大官使內侍李思敬將軍烏承恩宣慰  
便令討殘賊明年改元乾元四月肅宗使烏承恩為副  
使候伺其過而殺之初承恩父知義為節度思明常事

知義亦有開獎之恩以此光弼冀其無疑因謀殺之承恩至范陽數漏其情夜取婦人衣衣之詣諸將家以翻動之意諭之將以白思明思明甚懼無以為驗有頃承恩與思敬從上京來宣恩命畢將歸私家思明留承恩且于館中曰思明當有所議已令幃其所寢之床伏二人於其下承恩有小兒先留范陽思明令省其父夜後承恩語其子曰吾受命除此逆胡便授吾節度矣床下二人叫呼而出以告思明思明令執之搜其衣囊得朝



廷所與阿史那承慶鐵券及光弼與承恩之牒云承慶  
事了即付鐵券不了不可付之又得簿書數紙皆載先  
所從反軍將名承恩與之曰我何負于汝而至是耶承  
恩稱死罪曰此太尉之謀也思明集軍將官吏百姓西  
向大哭曰臣以三大州之地十萬衆之兵降國家赤心  
不負陛下何至殺臣因榜殺承恩父子囚李思敬遣使  
表其事朝廷又令中使慰諭國家與光弼無此事乃承  
恩所為殺之善也又有使從京至執三司議罪人狀以

示思明思明曰陳希烈已下皆重功之臣上皇棄之幸  
蜀既收復天下此皆當慰勞之今尚見殺況我本從祿  
山反乎諸將皆云烏承恩之前事情狀可知光弼尚在  
憂不細也大夫何不取諸將狀以誅光弼以謝河北百  
姓主上若不惜光弼為大夫誅之大夫乃安不然為患  
未已思明曰公等言是乃令耿仁智張不矜修表請誅  
光弼謝河北若不從臣請臣則自領兵往太原誅光弼  
不矜初以表示思明及封入函耿仁智盡削去之寫表

者密白思明思明怒甚執二人於庭曰汝等何得負我  
命斬之仁智事思明頗久意欲活之却令召入謂之曰  
我任使汝向三十年今日之事我不負汝仁智大叫曰  
人生固有一死須存忠節今大夫納邪說為反逆之計  
縱延旬月不如早死請速加斧鑕思明大怒亂捶殺之  
腦流于地十月郭子儀領九節度圍相州安慶緒偷道  
求救於思明思明懼軍威之盛不敢進十二月蕭華以  
魏州歸順詔遣崔光遠替之思明擊而拔其城光遠脫

身南渡思明于魏州殺三萬人流血數日乾元二年正月一日思明于魏州北設壇僭稱為大聖周王建元應天以周贄為行軍司馬三月引眾救相州官吏敗而引退思明追慶緒等殺之併有其眾四月僭稱大號以周贄為相以范陽為燕京九月寇汴州節度使許驥合於思明思明益振又陷洛陽與太尉光弼相拒思明恣行光暴殺戮無辜上元二年潛遣人反說官軍曰洛中將士皆幽朔人咸思歸魚朝恩以為然告光弼及諸節度

僕固懷恩衛伯玉等可速出兵以掃殘賊光弼等然之  
乃出師南道齊進次榆泉賊委物偽遁將士等不復設  
備皆入城虜掠賊伏兵在北邙山下衝擊之士卒咸棄  
甲奔散魚朝恩衛伯玉退保陝州光弼懷恩棄河陽城  
退居聞喜步兵散死數千人軍資器械盡為賊有河陽  
懷州盡陷於賊思明至陝州為官軍所拒於姜子坂戰  
不利退歸永寧使朝義築三角城約一月內畢未泥思  
明至詔之對曰緣軍士疲乏暫歇耳又怒曰汝惜部下

兵違我處分令隨身數千人立馬看泥斯須而畢又曰  
待收陝州斬却此賊朝義大懼是夕思明居驛朝義在  
店中思明令心腹曹將軍總中軍兵嚴衛朝義將駱悅  
并許驥男李常等言主上欲害王悅與王死無日矣因  
言廢興之事古來有之欲喚取曹將軍舉大事可乎朝  
義迴面不應駱悅曰王若不應悅等即歸李家王亦不  
全矣朝義然之令許李常命曹將軍至悅等告之不敢  
拒其夜思明夢而驚悟據床惆悵每好伶人寢食置左

右以其殘忍皆恨之及此問其故曰吾向夢見水中沙  
沙上羣鹿渡水而至鹿死水乾言畢如廁伶相謂曰鹿  
者祿也水者命也知祿命俱盡矣悅駱入問思明所在  
未及對殺數人因指在廁思明覺變踰牆出至馬槽糒  
馬騎之駱悅等至今僱人周子俊射中其臂落馬曰是  
何事悅等告以懷王思明日我朝來語錯合有此事然  
汝殺我太疾何不待我收長安終事不成矣因急呼懷  
王者三曰莫殺我囚我却罵曹將軍曰這賊誤我這賊

誤我悅遂令腹心手擒思明赴榆泉驛曰事已成矣朝  
義曰莫驚聖人否莫損聖否悅曰無時周贄許冀統後  
軍在福昌朝義令許季常往告之贄聞驚欲仰倒朝義  
領兵迴贄等來迎殺贄思明至榆泉驛縊殺之朝義便  
僭偽位寶應二年為李懷光所擒梟首送闕下

代宗孝武皇帝

唐書曰代宗孝武皇帝諱豫肅宗長子母曰章敬皇太  
后吳氏以開元十四年十二月生于東都上陽宮初名



倣年十五封廣平王玄宗諸孫百餘上為嫡皇孫字量  
洪濶寬而能斷喜怒不形於色仁孝溫恭動必由禮幼  
好學尤專禮易玄宗鍾愛之祿山之亂京城陷賊從肅  
宗蒐兵靈武以上為天下兵馬元帥時朝廷草創兵寡  
寡弱上推心宣示招懷流散北至彭原兵衆數萬後肅  
宗迴幸鳳翔時房琯郭子儀繼戰不利賊鋒方銳屢來  
寇襲上選求勇幹頗挫其鋒聖慮以寧士心大振後帥  
師進討泣而辭步出闕門方始乘馬回紇葉護王子率

兵入助勇冠諸蕃上接以優恩結為兄弟故香積之戰  
賊徒大敗遂安西京兩道雖子儀嗣業之奮命由上恩  
信結於士心故人思自效既收京城民庶安堵秋毫不  
犯遺老歡迎對之歆歔聞賊殘衆猶保陝郊即日長驅  
東號移新店之役一戰大捷慶緒之黨十殲七八數旬  
之間河南底定西都陝復二聖迴鑾統率之功推而不  
受肅宗還京改封楚王乾元元年三月改封成王四月  
庚寅立為皇太子改名豫上元末年兩宮不豫太子往

來侍疾躬嘗藥膳衣不解帶者久之後承監國之命流涕從之寶應元年四月肅宗大漸所幸張皇后無子后懼上功高難制陰引越王係於宮中將圖廢立己丑皇后矯詔居太子中宮李輔國程元振素知之乃勒兵於凌霄門候太子至即衛從太子入飛龍厩以俟其變是夕勒兵於三殿收捕越王係及內官朱光輝馬英俊等禁錮之幽皇后于別殿丁卯肅宗崩程元振等始迎上於九仙門見羣臣行監國之禮己巳即皇帝位於柩前


二年秋七月壬寅朔戊申羣臣上尊號曰寶應元聖文  
武皇帝御含元殿受冊壬子御宣政殿宣制改元曰廣  
德大赦天下是月吐蕃大寇河隴秦成渭三州又大  
震關西臨蘭廊河鄯洮岷等州盜有隴右之地己丑吐  
蕃寇涇州刺史高暉以城降因為吐蕃鄉道冬十月庚  
子朔辛未高暉引土蕃犯京畿寇奉天武功盩厔等縣  
蕃軍自司竹園渡渭循南山而東丙子車駕幸陝州戊  
寅吐蕃入京師立廣武王承宏為帝仍逼前翰林學士

于可封為制封拜辛巳車駕至陝州子儀在商州會六  
軍使張知節烏崇福長孫全緒等率軍繼至軍威遂振  
舊將王甫誘集京城惡少年齊擊鼓於朱雀街諸軍震  
攝狼狽奔潰庚寅子儀收京城壬辰以宰臣元載判天  
下元帥癸巳以郭子儀為京城畱守十二月丁亥車駕  
發陝郡還京辛卯鄂州大風火發江中焚舡三千艘焚  
居人廬舍二千家甲午上至自陝州二年二月己巳朔  
冊天下兵馬元帥尚書令應王适為太子癸酉上親薦

獻太清宮太廟乙亥祀昊天上帝于園丘冬十月丙寅  
僕固懷恩引吐蕃二萬寇邠州節度使白孝德閉城拒  
守丁卯寇奉天京師戒嚴先鋒將郭晞破賊營於邠州  
西俘斬數百計三年春正月癸卯朔詔大赦天下改為  
永泰元年三月庚戌吐蕃請和勅宰臣元載杜鴻漸與  
蕃使同盟于興唐寺辛亥大風拔木是春大旱京師米  
貴斛至萬錢九月丁酉僕固懷恩死于靈州之鳴沙縣  
時懷恩誘吐蕃數十萬寇邠州蕃將尚給思贊磨尚悉

東贊等冠奉天醴泉黨項羌渾如刺寇同州及奉天逼鳳翔府鹽屋縣京師戒嚴九年八月辛未幽州節度使朱泚遣弟滔奉表請自入朝兼自率五千騎防秋許之詔所司築第待之十年春正月乙未朔丁酉昭義將裴志清逐其帥薛萼萼奔洛州上章待罪志清率衆歸田承嗣乙未朱泚乞留京師西征吐蕃以弟滔權為幽州留後許之十二年三月宰相元載王縉得罪下獄命吏部尚書劉晏訊鞠之辛巳制中書侍郎平章事元載賜

自盡門下侍郎平章事王綬貶撫州刺史十四年五月  
癸卯上不豫至辛亥不視朝辛酉詔皇太子監國是夕  
上崩于紫宸之內殿謚曰睿文孝武皇帝廟號代宗十  
月己酉葬元陵





太平御覽卷一百十二

欽定四庫全書

子部

太平御覽卷一百十三至  
七

詳校官侍讀學士<sub>臣</sub>沈咸熙

員外郎<sub>臣</sub>牛稔文覆勘

總校官降調編修<sub>臣</sub>倉聖脈

校對官助教<sub>臣</sub>胡予襄

謄錄監生<sub>臣</sub>何需霖

欽定四庫全書

太平御覽卷一百十三

宋 李昉等 撰

皇王部三十八

唐德宗孝文皇帝

朱泚 附

順宗安皇帝

德宗孝文皇帝

唐書曰德宗孝文皇帝諱适代宗長子母曰睿真皇后

沈氏天寶元年四月癸巳生于長安東宮其年十一月  
拜特進封奉節郡王代宗即位之年五月以上為天下  
兵馬元帥改封魯王八月改封雍王廣德二年二月立  
為皇太子大曆十四年五月辛酉代宗崩癸亥即位于  
太極殿六月己亥朔御丹鳳樓大赦天下八月以門下  
侍郎平章事崔祐甫為中書侍郎平章事甲辰以道州  
司馬楊炎為門下侍郎平章事乙巳遣太常少卿韋倫  
使吐蕃以蕃俘五百人還之示修好也冬十月吐蕃合

南蠻之衆號二十萬三道寇茂州扶文黎雅等州連陷  
郡邑發禁兵四千助蜀大破之十二月乙卯立宣王誦  
為皇太子建中元年春正月丁卯朔御含元殿改元建  
中羣臣上尊號曰聖神文武皇帝己巳朝太清宮庚午  
謁太廟辛未有事於郊丘還宮御丹鳳門大赦天下自  
艱難以來徵賦名目頗多今後除兩稅外輒率一錢以  
枉法論二年三月築汴州城初大厯中李正己有淄青  
齊海登萊沂密德棣曹濮兗鄆十五州之地李寶臣有

恒定易趙深冀滄七州之地田承嗣有魏博相衛沼貝  
澶七州之地梁崇義有襄鄧均房復郢六州之地各聚  
兵數萬始因叛亂得立雖朝廷寵待加恩心猶疑貳皆  
連衡盤結以自固先是汴州以城隘不容衆請廣之至  
是築城五月丙寅以軍興什一而稅冬十一月尚書左  
僕射楊炎貶崖州司馬尋賜死三年四月封朱滔為通  
義郡王朱滔王武俊田悅等叛十一月朱滔田悅王武  
俊於魏縣軍壘各相推獎僭稱王號署官名如國初親

王行臺之制丁丑李希烈自稱天下都元帥太尉建興王  
與朱滔等四盜膠固為逆四年春正月鳳翔節度使張  
鎰與吐蕃宰相尚結贊同盟於清水庚寅李希烈陷汝  
州執知州李元吉而去東都震駭甲午遣顏真卿宣慰  
李希烈軍八月丁未李希烈率眾三萬攻哥舒曜於襄  
城東都危急冬十月詔涇原節度使姚令言率涇原之  
師救哥舒曜丁未涇原軍出京城至澧水倒戈謀叛姚  
令言不能禁止上令載繒綵二車遣晉王往慰諭之亂

兵已陳於丹鳳闕下召神策軍拒之無一人至者上與太子諸王妃主百餘人出苑北門右龍武軍使令狐建方較射于軍中聞難聚射士得四百人扈從其夕至咸陽飯數已而過戊申至奉天己酉元帥都虞候渾瑊以子弟家屬至乃以城為行在都虞候亂兵既剽京城屯於白華乃於晉昌里迎朱泚為帥稱太尉居含元殿上以奉天隘欲幸鳳翔士子鳳翔軍亂殺節度使張鎰乃止癸丑李希烈陷襄城哥舒曜走洛陽丁巳邠寧節度韓



遊環與喻惟明率兵三千至纔入奉天賊軍亦至乃出拒之王師不利賊攻愈急矢石雨下死傷者衆人心危蹙上與渾瑊對泣朱泚據乾陵作樂下瞰城中辭多侮慢戊子朔方節度使李懷光遣兵馬使張韶奉表言大軍將至乃令昇韶巡城叫呼歡聲動地賊不之測疑懼緩攻癸巳懷光軍次醴泉是夜賊解圍而去神策將李晟自定州率師赴難軍於渭橋興元元年春正月上在奉天詔曰克致興化必在推誠忘已濟人不吝改過朕嗣

服丕構君臨萬邦失守宗祧越在草莽不念率德誠莫  
追於既往永言思咎期有復於將來明徵其義以示天  
下予小子懼德不嗣罔敢怠荒然以長於深宮之中暗  
於經國之務積習易溺居安忘危不知稼穡之艱難不  
恤征戍之勞苦澤靡下究情未上通事既壅隔人懷疑  
阻猶昧省已遂用興戎徵師四方轉餉千里賦車籍馬  
遠近騷然行齋居送衆庶勞止力役不息田萊多荒暴  
令峻於誅求疲民空於杼軸轉死溝壑離去鄉閭邑里

丘墟人烟斷絕天譴於上而朕不寤人怨於下而朕不  
知馴致亂階變起都邑賊臣乘釁肆逆滔天曾莫愧畏  
敢行凌僞萬品失序九廟震驚上辱於祖宗下負於蒸  
庶痛心覩面罪實在予永言愧悼若墜泉谷賴天地降  
祐神人叶謀將相竭誠爪牙宣力羣盜斯屏皇維載張  
將弘永圖必布新令朕晨興夕惕惟省前非乃者公卿  
百寮用加虛美以聖神文武之號被蒙暗昧之躬固  
辭不獲俯遂羣議昨因內省良所瞿然自今已後中外

書奏不得言聖神文武之號今上元統厯獻歲發祥宜  
革紀年之號式敷在宥之澤可大赦天下改建中五年  
爲興元元年李希烈田悅王武俊李納咸以勲舊繼守  
藩鎮維撫馭垂方致其疑懼皆由上失其道而下罹其災一  
切並與洗滌復其爵位待之如初仍即遣使分道宣諭  
朱滔與賊泚連坐路遠必不同謀朕方推以至誠務存  
弘貸如能効順亦與維新朱泚反易天常盜竊名器暴  
犯陵寢所不忍言獲罪祖宗朕不敢赦除泚外並從原

宥春二月甲子加連城郡王李懷光太尉仍賜鐵券赦  
三死罪懷光怒曰凡人臣反逆乃賜鐵券恕以不死今  
懷光是反定矣因投之於地上聞懷光將叛令翰林學  
士陸贄往慰諭之其詞禮益倨悖李晟尋自咸陽移兵  
東渭橋避懷光也晟以懷光反狀已明請上幸蜀丁卯  
車駕幸梁州畱戴休顏守奉天三月懷光燒營走歸河中  
庚寅車駕次城固壬辰至梁州四月辛丑朔時將士未  
給春衣上猶夾服漢中早熱左右請御暑服上曰將士

未易冬服獨御春衫可乎俄而貢物繼至先給諸軍而始御之五月李晟自渭北移軍於光泰門外賊來薄我軍士奮擊大敗之斬馘千級戊戌晟列陣於光泰門外遣騎將史萬項往神麴村開苑牆二百餘步賊樹柵當之我軍爭拔柵與賊血戰賊黨大敗追擊至白華朱泚姚令言率衆萬餘遁去晟收復京城是日渾瑊與戴休顏亦破賊三千於咸陽韓遊環追朱泚於涇州六月李晟上收城露布上覽之涕下沾襟涇州田希鑒斬姚令

言幽州軍士韓旻於彭原斬朱泚並傳首至行在乙巳  
遣吏部侍郎班宏入京宣慰六月甲午車駕發興元秋  
七月丙子次鳳翔府壬子至自興元辛卯御丹鳳樓大  
赦天下九月丁卯上顧謂宰臣曰今大盜雖除時猶多  
難宜廣延納以達下情近日諫官都無論奏自今每正  
衙及延英坐日常令朝臣三兩人面奏時政得失庶有  
弘益貞元元年正月丁卯朔御含元殿受朝賀禮畢宣  
制大赦天下改元時關東大饑賦調不入國用益窘關

中饑民蒸蝗蟲而食之五月分命朝臣禱羣神以祈雨  
蝗自海而至羣飛蔽天每下則草木及畜毛無復子遺  
穀價騰踊九月朔方大將牛名俊斬李懷光傳首于闕  
下馬燧收復河中十月上御正殿策賢良方正能直言  
極諫等三科舉人十一月癸卯上親祀昊天上帝於圜  
丘禮畢御丹鳳樓大赦天下二年四月丙寅淮西李希  
烈爲其牙將陳仙奇所醜並誅其妻子仙奇以淮西歸  
順九月乙巳吐蕃寇好時京師戒嚴李晟部將王秘擊吐



蕃於汧陽城敗其軍辛亥寇鳳翔李晟出師禦之一夕而退冬十月李晟拔吐蕃摧沙堡十一月冊淑妃王氏爲皇后丁酉后崩諡曰昭德辛丑吐蕃陷鹽州三年三月河東馬燧來朝時吐蕃尚結贊使大將論煩熱卑辭厚意告馬燧請兩國同盟上疑其不誠不允故燧自將論煩熱入朝盛言蕃相請盟可以保信上從之五月辛未侍中渾瑊與吐蕃宰相尚結贊同盟于平涼爲蕃兵所劫瑊遁而獲免崔漢衡已下將吏陷沒者六十餘人

四年正月朔上御丹鳳樓大赦天下京師地震辛亥又震甲寅又震宴羣臣於麟德殿己未地震丁卯有司條奏省官具左右常侍太子賓客請依前置四員從之壬戌加置諫議大夫八員分中書四員爲右門下四員爲左是月吐蕃寇涇邠寧廊慶等州焚彭原縣邊將閉城自固賊驅人畜三萬計凡二旬而退五年春正月乙卯詔自今宜以二月一日爲中和節以代正月晦日備三令節數内外官司休假一日二月庚子以大理卿董晉爲

門下侍郎同平章事以御史中丞竇參爲中書侍郎平  
章事兼轉運使六年春正月戊申大雪二月戊辰朔百  
僚會宴於曲江亭上賦中和節羣臣賜宴詩七韻是日  
百僚進北人本業三卷八年四月乙未貶中書侍郎平  
章事竇參爲郴州別駕以尚書左丞趙憬兵部侍郎陸贄  
並爲中書侍郎同中書門下平章事八月以天下水災命  
朝臣宣撫賑貸河南河北山南江淮凡四十餘州大小漂  
溺死者二萬餘人九年正月癸卯初稅茶歲得錢四十

萬貫從監鐵使張滂所奏茶之有稅自此始五月乙巳  
韋皋破吐蕃峨和定廉城通鶴軍凡平堡五十餘所十  
月環王國獻犀牛上令見于太廟十年冬十月御宣政  
殿試賢良方正能直言極諫等舉人十二月貶中書侍  
郎平章事陸贄爲太子賓客十二年三月以戶部侍郎  
裴延齡爲戶部尚書六月初置左右護軍中尉十二月  
乙未大雪平地二尺竹栢多死環王國所獻犀牛是冬  
凍死上著刑政箴一首癸未回紇南詔劔南西山八國女

國王並來朝賀十三年春正月吐蕃贊普遣使修好塞  
上以聞上以犬戎負約不受其使十六年春正月恒翼  
易定陳許河陽四鎮之師與賊戰皆不利而退二十一  
年春正月御含元殿受朝賀是日上不康癸巳會羣臣  
於宣政殿宣遺詔皇太子宜於柩前即位是日崩於會  
寧殿享壽六十四謚曰神武孝文皇帝廟號德宗葬崇  
陵

朱泚附

唐書曰朱泚幽州昌平人曾祖利贊善大夫贈禮部尚書祖思明太子洗馬贈太子太師父懷珪天寶初事范陽節度使裴寬爲衙前將授折衝將軍及安祿山史思明反叛累爲管兵將寶應中李懷仙歸順奏爲薊州刺史平盧軍留後柳城軍使卒贈左僕射泚以父資從軍幼壯偉腰帶十圍騎射武藝亦不出人外若寬和中頗忍忌然輕財好施每征戰所得賞物輒分與麾下將士以是爲衆所推故得濟其禱謀初隸李懷仙爲十將改

經畧副使朱希采既殺李懷仙自爲節度以泚宗姓甚  
委信之希采爲政苛酷人不堪命大厯七年秋竟爲孔  
目官李懷瑗所殺倉卒之際未有所從泚營在城北弟  
滔主衙內兵亦得衆心滔變詐多端潛使百餘人於衆  
中大言曰節度使非城北朱副使莫可衆既無所從因  
共推泚泚遂權知畱後遣使奉表京師十月拜檢校左  
散騎常侍兼御史中丞幽州盧龍節度等使八年三月  
遷幽州盧龍節度等使幽州長史兼御史大夫其年泚上表

令弟滔率兵二千五百人赴京西防秋代宗嘉之手詔  
褒美九年就加檢校戶部尚書賜實封百戶幽州及河  
北諸鎮自天寶末便爲逆亂之地李懷仙朱希彩與連  
境三節度名雖向順未曾朝謁至是泚率先上表請自  
領部騎三千入覲詔修甲第以待之九月泚至京師代  
宗御內殿引見賜御馬兩匹戰馬十匹金銀錦綵甚厚又  
以器物十牀馬四十匹絹二萬疋衣一千七百襲賜其  
將士宴犒之盛近時未有泚又上表請留京師從之因



授其弟滔御史大夫幽州節度留後仍以河陽永平軍  
防秋兵郭子儀統之決勝軍楊猷兵李抱玉統之淮西  
鳳翔兵馬璘統之汴宋淄青兵俾泚統焉十一年八月  
加拜同平章事尋令出鎮奉天行營復賜金銀繒綵並  
內庫弓箭以寵之十二年加檢校司空代李抱玉爲隴  
右節度使權知河西澤潞行營兵馬事德宗嗣位加太  
子太師鳳翔尹實封至三百戶建中元年涇州將劉文  
喜阻兵爲亂加泚四鎮北庭行軍涇原節度與諸軍討

伐涇州平加泚中書令還鎮鳳翔帝以舒王謨遙領涇  
原節度二年又加泚太尉朱滔將反叛陰使人與泚計  
議以帛書內蠟丸中置髮髻間河東節度馬燧搜獲之  
以聞並送帛書及所遣使泚惶懼頓首乞歸罪有司上勉  
之曰千里不同謀非卿之過三年四月以張鎰代泚爲  
鳳翔隴右節度畱後畱泚京師加實封至一千戶與一  
子正員官其幽州盧龍節度太尉中書令並如故四年  
十月涇原兵叛鑾駕幸奉天叛卒等以泚嘗統涇州知

其失權廢居怏怏思亂羣寇無帥幸泚政寬乃相與謀  
曰朱太尉久囚空宅若迎而爲主事必濟矣姚令言乃  
率百餘騎迎泚於進昌里第泚乘馬擁從向闕燭炬星  
羅觀者萬計入居含元殿明日移白華殿但稱太尉朝  
臣有謁泚者悉勸奉迎鑾駕既不合泚意皆逡巡而退  
光祿卿源休至遂屏人移時言多悖逆又盛陳成敗稱  
述符命勸其僭偽泚甚悅之又李忠臣張光盛繼至咸  
以官閒積憤樂於禍亂鳳翔涇原大將張庭芝段誠諫

以潰卒三千餘自褒城而至賊泚自謂衆望所集僭竊之心自此而定乃以源休爲京兆尹判度支李忠臣爲皇城使段秀實久失兵柄故推心委之遂發銳師三千聲言奉迎乘輿實陰有逆謀秀實與劉海賓謀誅泚且慮叛卒之震驚法駕乃潛爲賊符追所發兵至六日兵乃絡繹而回因與海賓同入見泚爲陳逆順之理而海賓於靴中取匕首爲其所覺遂不得前秀實知不可以義動遂奪源休象笏挺而擊泚仍大呼曰反虜當斬泚

舉臂衛首秀實格拉之沟沟然李忠臣馳助泚泚素多  
力纔破其面逆徒謀集秀實海賓遂併見害明日聲言  
以親王權主社稷士庶競往觀之八日源休姚令言李  
忠臣張光晟等八人導泚自白華入宣政殿僭即偽位  
自稱大秦皇帝號應天元年愚智莫不憤怒侍衛皆卒  
伍僚吏行列不過十餘人下偽詔曰幽囚之中神器自  
至豈朕薄德所能經營彭偃之詞也僞署姚令言爲侍  
中李忠臣爲司空兼侍中源休爲中書侍郎平章事判

度支蔣鎮爲吏部侍郎樊系爲禮部侍郎儀制使許季常爲京兆尹洪經綸爲太常少卿彭偃爲中書舍人裴揆崔幼真爲給事中崔宣爲御史中丞張光晟仇敬仍敬釭張寶何望之段誠諫張庭芝杜如江爲節度使仍以其兄子遜爲太子遙封弟滔爲冀王太尉尚書令尋又號皇太弟十月泚自領兵侵逼奉天竊威儀輦輅闌隘道途蟻聚之衆軍勢頗盛以姚令言爲元帥張光晟爲副以李忠臣爲京兆皇城畱後居中書省尋以蔣鎮

爲門下侍郎李子平爲諫議大夫並平章事泚軍舍於  
城下渾城韓遊環禦之泚衆大敗死者萬計泚收軍於  
奉天東三里下營大修攻具明日泚又分兵營於乾陵  
下瞰城內大震十一月三日杜希全與泚衆戰於莫谷  
官軍不利自是賊衆驕怠王師乘城而戰人百其勇賊  
多敗衄或出野戰官軍又獲利焉泚乃大驅百姓填塹  
夜攻城城中設竒以應之賊乃退縮西明寺僧法瑩有  
巧思爲泚造雲梯十五日辰時梯臨城東北隅城內震

駭渾瑊侯仲莊設大坑爲地道陷之又縱火焚其梯東風起吹我軍衆頗危俄而風迴吹賊軍瑊益薪潑油金鼓齊震風火俱熾須臾雲梯與亮黨同爲灰燼城中三門悉出兵王師又捷其夜兵復出攻泚衆敗績李懷光以五萬人來援自河北至泚衆惶駭因而潰長圍遂解衆以爲懷光三日不至城則危矣二十日夜泚走至京城時姚令言於城造戰格拋樓每坊圍練人心大擾泚自奉天迴乃悉令去之曰攻戰吾自有計前此每三五日



即使人偽自城外來周走號令曰奉天已破百姓聞之  
莫不涕泣道路聞寂時有八臺省吏人不過十數輩郎  
官六七人而亦令依常年舉選初有數十人陳狀旬日  
亦皆屏退泚自號其宅曰潛龍宮悉移內庫珍寶以實  
之識者曰易稱潛龍勿用此敗徵也無幾百姓剽奪其  
珍寶泚不能禁止明年正月一日泚改偽國號曰漢稱  
天皇元年二月李懷光既圖叛逆遣使與泚通和鑾駕  
幸梁洋自此衣冠之潛匿者出受偽官十七八馬懷光

初與泚往復通好甚密以錢穀金帛相餽遺泚與書事之如兄約云削平關中當割據山河永爲隣國及懷光決計背叛逼乘輿遷幸泚乃下偽詔書待懷光以臣禮仍徵兵馬懷光既爲所賣慚怒憤恥遂領衆遁歸河中三月李晟駱元光尚可孤之衆悉於城東累敗泚衆四月泚使韓旻宋歸朝張庭芝等寇武功渾瑊以其衆與吐蕃論莽羅大敗旻歸朝殺逆黨萬餘人於武亭川五月又使仇敬忠寇藍田尚可孤擊之大破泚衆擒敬忠

斬之李晟駱元光尚可孤悉還師齊進晟屯光泰門逆  
徒拒官軍王師累捷二十八日官軍入收京師逆黨大  
潰泚與姚令言張庭芝源休李子平朱遂以數千人西  
走其餘黨或奔竄或來降泚衆緣路潰散乃奔涇州纔  
百餘騎而已田希鑒閉門登陴泚令人謂希鑒曰我與  
爾節度何故背恩希鑒乃使人自城上擲泚所送旌節  
於外續又投火焚之泚遂過數里息於逆旅泚將梁庭  
芬入涇州說田希鑒曰我公此日殺馮河清背叛今雖

歸順國家必不久容公他日不免受禍何如開門納朱公與共成事希鑒以爲然庭芬乃追及朱泚言之泚大悅使庭芬却往涇州庭芬請授已尚書平章事泚不從庭芬既求宰相不得不復往涇州從泚至寧州彭原縣西城屯與心腹宋惟孝共射泚泚走墜故窖中泚左右韓旻薛綸高幽巖武震朱進卿董希芝共斬泚使宋應傳首以獻泚死時年四十三姚令言投涇州源休李子平走鳳翔尋並斬獲宋歸朝之敗武功降於李懷光送興元

斬之唯不獲朱遂傳爲野人所殺或云與泚子婿僞金  
吾將軍馬悅潛走党項部落數月得達幽州泚之潛逆  
宦豎朱重曜頗親密用事泚每呼之爲兄時賊中以臘  
月大雨僞星官謂泚曰當以宗中年長者禳其災變泚  
乃毒殺重曜以王禮葬焉及京師平出其尸而斬之

順宗安皇帝

唐書曰順宗安皇帝諱誦德宗長子母昭德皇后王氏  
上元二年正月生於長安之東內大厯十四年封宣王

建中元年正月立爲皇太子貞元二十一年正月癸巳  
德宗崩丙申即位於太極殿上自二十年九月風疾不  
能言暨德宗不豫諸王親戚皆侍醫藥獨上卧病不能  
侍德宗彌留思見太子涕咽久之大行發喪人情震懼  
上力疾練服見百寮於九仙門既即位知社稷有奉中  
外始安庚子羣臣上書請聽政二月以吏部郎中韋執  
誼爲尚書左丞同中書門下平章事壬寅以太子侍書  
翰林待詔王伾爲左散騎常侍充翰林學士以將仕郎

前蘇州司功叅軍翰林待詔王叔文爲起居舍人充翰林學士甲子御丹鳳樓大赦天下三月癸酉詔立廣陵郡王淳爲皇太子改名純赦京城繫囚以給事中陸贄中書舍人崔樞並爲太子侍讀七月詔曰朕承九聖之烈荷萬邦之重顧以寡德涉道未明虔恭畏懼不克負荷恐上墜祖宗之訓下貽卿士之憂夙夜祇勤如臨淵谷而積疾未復至于經時怡神保和常所不暇永惟四方之大萬務之殷不躬不親慮有曠廢加以山陵有日

霖潦踰旬是用徹于朕心以答天戒其軍國政事宜令  
皇太子勾當時上久疾不復延納宰臣共論大政事無  
巨細皆決於李忠言王伾王叔文物論喧雜以爲不可  
藩鎮屢上牋於皇太子指三豎之撓政故有是詔以太  
常卿杜黃裳爲門下侍郎左金吾衛大將軍袁滋爲中  
書侍郎並同中書門下平章事皇太子見百寮於朝堂  
八月庚子詔曰惟皇天祐命烈祖誕受方國九聖儲祉  
萬邦咸休肆予一人獲繼丕業嚴恭守位不遑暇逸而



天祐不降疾恙無瘳將何以奉宗廟之靈展郊禋之禮  
疇茲庶尹對越上帝內愧于朕心上畏于天命夙夜祇  
慄深惟永圖一日萬幾不可以久曠天工人代不可以  
久違皇太子純睿哲溫文寬和仁惠孝友之德愛敬之  
誠通乎神明格於上下是用法皇王至公之道遵父子  
傳國之制付之重器以撫兆人必能宣祖宗之重光荷  
天地之休命奉若成憲永綏四方宜令皇太子即皇帝  
位朕稱太上皇居興慶宮制稱誥辛丑誥曰有天下者

傳歸於子前王之制也欽若大典斯為至公式揚耿光  
用休文德朕獲奉宗廟臨御萬方降疾不瘳庶政多闕  
乃命元子代予守邦爰以令辰光膺冊禮宜以今月九  
日冊皇帝於宣政殿國有大命思俾惟新宜因紀元之  
慶用覃在宥之澤宜改貞元二十一年為永貞元年天  
下元罪降徒流已下遞減一等立良娣王氏為太上皇  
后良媛董氏為太上皇德妃壬寅貶王伾為開州司馬  
王叔文為渝州司戶元和元年正月丙寅朔皇帝率百

察上太上皇尊號曰應乾聖壽甲申太上皇崩於興慶宮之咸寧殿享年四十六謚曰至德大聖大安孝皇帝廟號順宗葬于豐陵史臣韓愈曰順宗之爲太子也留心藝術善隸書德宗工爲詩每賜大臣方鎮詩制必命書之性寬仁有斷禮重師傅必先致拜從幸奉天賊泚逼迫常身先禁旅乘城拒戰督勵將士無不奮激德宗在位歲久稍不假權宰相左右倖臣如裴延齡李齊運章渠牟等因間用事刻下取功而排陷陸贄張滂輩人

不敢言太子從容論諍故卒不任延齡渠年爲相常侍  
宴魚藻宮張水嬉絲盤雕靡宮人引舟爲權歌絲竹間  
發德宗歡甚太子引詩人好樂無荒爲對每入內未嘗  
以顏色假借宦官居儲位二十年天下陰受其賜惜乎  
寢疾踐祚近習弄權而能傳政元良克昌運祚賢哉

太平御覽卷一百十三